

東華續錄

東華集

東華續錄同治四

臣王先謙敬編 臣張式恭恭校

十二月甲寅朔諭議政王軍機大臣等前因湖南軍務緊要江忠義未能赴黔諭令田興恕兼署貴州巡撫惟該大臣以督辦軍務爲重所有巡撫篆務日久恐難兼顧著略秉章於湖北湖南兩省司道大員內擇其畱心民瘼長於吏治並熟悉貴州情形者秉公保奏一二員候旨派往貴州署理巡撫事務再前有人奏田興恕目不知書不達政體其前後左右皆譏詔面諛之人感藉權勢請託公行該提督趾高氣揚毫無顧忌其奏報勝仗種種不符等語田興恕驍勇善戰自屬可取若如所參聽信左右之人顛倒是非不辨賢否豈復堪膺節鉞重任如果目不知書則奏牘一切假手於人尤難保無弊竇賂秉章於田興恕之爲人自屬深悉是否因驟居高位肆無忌憚其奏報軍情有無不實該督諒亦必有聞見均著秉公查奏毋稍徇隱將此由六百里諭令知之○諭旨國體通籌進剿機宜○予安徽陣亡參將于殿甲知府寶元顯祭葬世職○乙卯召前任戶部左侍郎羅惇衍大理寺少卿田雨公雲南提督傅振邦陝西提督孔廣順甘肅甯夏鎮總兵官鄭魁士降調浙江布政使徐宗幹來京聽候簡用○丙辰諭內閣前因僧格林沁覆奏譚廷襄將業經勒休降調道員王觀澄派令帶勇委用非人藩司清盛之父柏齡往遊泰山該藩司不能諫止泰安縣知縣方振業輒爲豫備公館意存見好均屬咎無可辭當經降旨將譚廷襄等交部分別嚴議議處據吏部議奏請將譚廷襄等分別降調等語前任刑部郎中柏齡山東布政使清盛均著照部議降四級調用前任泰安縣知縣方振業著照部議降三級調用山東巡撫譚廷襄著加恩改爲降三級畱任○諭議政王軍機大臣等譚廷襄奏遵議河防布置並曹郡近日情形一摺見在蓮花池竹口賊寨已經國瑞等帶兵攻克劉占考等亦窮蹙乞降濮范東岸毗連鄆城鉅野荷澤等屬見經僧格林沁親統大兵在羅河口一帶著一面肅清沿河北岸一面派兵駐紮曹州郡城相度機宜講求清蘆團寨之法辦理一處務即了當一處不可稍涉遷就責成該地方官將善後事宜詳慎妥實經理山東省大半糜爛而尤莫甚於曹州此處辦理著實即其餘東昌沂兗均可次第戡定著該大臣等妥籌辦理一面知照譚廷襄將移汛安營及馬良集團營一切善後章程豫爲籌辦東昌欽匪素與直隸曲周雞澤一帶多所勾結此時匪等乞降須防反覆卽誅鋤勿驟難淨盡勝保將欲移軍南下必須酌量分撥一軍仍紮東昌等處要地並著文煜於直東邊界地方備兵策應以防衝突至濮范防務譚廷襄所帶兵勇千餘實屬不敷分布著僧格林沁酌量另撥馬隊五六百名駐紮東昌交該撫調遣河西開東一路應由文煜派兵駐守並飭地方將渡船全撤西岸以杜竄越河南省考城縣與曹縣毗連雖係乾河尚有隄壕可守應由嚴樹森隨時堵截均著各該督撫等實力辦理各專責成不准稍涉鬆懈譚廷襄原摺均著鈔給閱看將此由六百里各諭令知之○諭譚廷襄奏遵籌防河布置事宜並陳近日曹郡剿匪情形及親赴東昌派員查拏武定鹽梟各摺片大清河自李連橋以上卽爲黃水穿運之處毗連濮范等處匪蹤徧地見難經官軍剿撫兼施而水套內伏莽尙多荷澤一帶團寨亦與賊匪暗通該撫因請飭僧格林沁肅清沿河北岸另派一軍駐紮曹郡並請飭勝保南下時仍應畱軍北路扼要駐紮及直隸境

丙協力堵剿所籌尙屬周妥已諭知僧格林沁等酌量辦理惟河沿北岸雖諭僧格林沁力籌肅清而匪勢既眾一時未能撲滅河道紛歧不可不豫爲防範張秋鎮已經該撫設立礮臺派兵扼守其上游范縣等處著一併查勘添造以資堵禦河面較寬之處爲礮所難及者卽著酌量情形添製礮船該省雖無諳練撐駕之人該撫當加意講求未可畏難苟安所稱移汛安營及馬良集團營並著迅速辦理山東全省糜爛見當籌畫辦理之方如何用人如何理財次第舉行以收實效該撫見赴東昌務將該郡應辦事件妥籌辦理不必急於回省轉致顧此失彼其武定鹽梟已經撥兵捕拏務當嚴行懲創使之畏懾兵威斷不可稍有將就了事之心水套之賊據奏兵力不能遽及著設法收集船隻撿渠埽穴見屆河冰堅凍剿除尤易不准稽延貽誤將此由六百里諭令知之○丁巳諭議政王軍機大臣等勝保奏漢范教匪蕩平河口肅清見籌善後一摺漢范一帶匪眾經官軍剿捕屢勝見在各旗教匪並擒匪巨股均經畏威投誠該大臣於降眾中挑選一千餘名隨軍助剿俾受箝制其餘老弱概令歸農辦理尙屬妥協惟該降眾人數眾多恐大兵移撤之後復行萌動務須妥籌善後經理得宜並督兵暫駐東省彈壓地方以定人心另片奏添募裁撤勇丁卽照所議覈明數目造冊報部以免糜費宋傑詩馬隊業經分別裁撤亦須妥爲安置毋令聚而爲匪正在寄諭間復據譚廷襄馳奏南捻五旗並出由陽山竄至單縣境內及金鄉縣石佛集等處僧格林沁之軍見移紮洪川口一帶距單縣不遠新收劉占考察降眾多係曹州土著外匪一至恐復生心且曹屬北路有兵東路無兵必應速爲豫備請飭勝保順道進兵與僧格林沁併力剿辦當可聚而殲旃等語著勝保迅卽會合僧格林沁大軍併力剿辦儘能趁此軍威將曹屬賊匪全行掃蕩該大臣安心南下可無後顧之憂勝保謀略素裕洞悉兵機定能迅奏膚功以慰廑念將此由六百里諭令知之○諭勝保奏擒首投誠見在籌辦收撫善後事宜一摺直東教匪挾眾橫行今已屢受大創羣酋一律乞降自應宣示威德許以自新惟匪數眾多箝制不易著文煜譚廷襄各派賢明精細之員會同各該地方妥爲安插毋令再滋事端儘能各安生業各團練丁役人等亦不得牽引前事挾仇妄拏致大兵撤後本地再爲後患勝保見回館陶辦理善後一切事宜將來總須統兵南下所有安置各匪眾卽責成文煜譚廷襄妥爲料理毋使從而生心謀爲不軌此事勝保止能辦其大概全在各該地方官經理得宜如果有派辦之員奉行不力再釀後患朕惟文煜譚廷襄是問勝保另片奏大名鎮總兵阿麟保人稍忠厚於軍務緊要之處不甚相宜請將通永鎮總兵伊綿阿對調阿麟保是否僅人地不宜抑有庸懦不能得力之處並著文煜確切查明據實覆奏再降諭旨正在寄諭間據譚廷襄奏報南捻出巢竄至單縣請飭勝保會合僧格林沁大軍剿辦一摺業經諭令勝保會同僧格林沁剿辦矣卽著譚廷襄督飭官兵相機策應其直東交界地方並著文煜嚴飭該文武妥爲防範毋稍疏懈將此由六百里各諭令知之○以貢賁爲山東布政使孫治爲山東按察使由直隸天○戊午僧格林沁西凌阿國瑞奏探報匪首劉占考之弟劉占桃及賊目梁繼海率眾占踞紅川口民團等於十一月十八日移營王家海二十日督帶官軍礮位並飭知府趙康侯等帶勇前往用礮轟擊該逆仍復死守西凌阿督令兵勇先越濠牆由東面攻入宛

州鎮總兵札隆武知縣陳烈各帶勇隊自西南分路攻入斃匪數百名賊匪欲撲西門經營總富和帶隊擊回等當將為隊調至東門外左右設伏旋有馬步賊匪千餘奪路逃出經營總蘇克金等帶領馬隊追殺十餘里至劉家橋劉占考老巢斃賊千餘名並將賊首劉占桃梁繼海殲斃圍內之賊投殺無遺等即於二十一日移營紅川口地南是日復帶兵馳剿劉占考老巢該逆之弟劉占先率黨死守我軍奮力圍攻該逆乘夜向南逃竄等督飭兵勇移紮劉家橋圍內立將賊圩平毀二十三日移營郭秉鈞老巢地東之寶珠口當派投誠之李燦章將郭秉鈞之弟郭秉鑑郭秉鎮誘出飭各營步隊前往將圍圩攻破斃賊數百名並將郭秉鑑郭秉鎮正法二十五日移營曹州府東南大屯地方紮營未定突有馬步賊匪數千來撲臣西凌阿督帶馬隊迎剿該逆列仗抵拒營總蘇克金繞賊北面衝壓逆勢不支遂均敗退我軍追殺十餘里斃賊千餘名餘匪向南竄逃二十六日督兵進攻佃戶屯賊圩民龐勳等出圖乞降聲稱賊首劉前已率眾南去圍內俱係良民等語當即准其投誠繳械我軍撤隊回營二十八日探得曹屬定曹等縣逆匪在金隄頭地南大董店等處屯聚二十九日臣西凌阿帶領馬步官軍進剿行至大張寺地方該逆馬步萬餘列仗來撲營總蘇克金等將賊擊退該逆隱伏各邨俟我軍撤回全股復出猛撲臣西凌阿復派各隊向西南斜擊馬隊奮力衝壓該逆紛紛敗竄我軍追殺十餘里斃賊千餘名餘匪仍竄入各邨伏匿查曹州府迤南曹縣各圍流為賊圩匪勢甚廣應察看情形相機進剿臣國瑞帶兵進攻范縣城池於十四十六等日用礮猛攻賊勢窮蹙城賊郭廷珍等具稟投誠二十日臣國瑞督帶馬步兵勇馳抵范縣郭廷珍出見當令呈繳器械郭廷珍等即率眾出城將槍礮馬匹交出官軍入城安撫居民其善後事宜咨行山東巡撫派委道府大員前往辦理前經譚廷襄收撫之王來鳳亦於是日來營臣國瑞曉以大義王來鳳情願反正仍帶團丁防守河岸並據王來鳳面稟劉占考等亦願投誠臣國瑞飭令王來鳳就近前往臣勝保軍營稟明辦理臣國瑞即帶隊起程馳赴曹州軍營會剿臣僧格林沁接據准徐揚海道吳棠稟報藍旗捻逆劉添詳劉添幅等於十一月十八日由永城一帶北竄黑旗捻逆李加齊等於二十日後起行又據探報南捻馬步由金鄉城南之甘魚頭一帶竄至單縣迤南興隆集等處盤踞似欲西竄定曹接應賊黨各等情臣等惟有激勵兵勇相機截剿再查馬步各隊在羅家樓紅川口劉家橋郭家唐房等處攻破賊圩屢獲勝仗上諭內閣曹州會匪占踞紅川口等處民圍經僧格林沁等督帶官軍攻擊疊將賊圩平毀斃賊甚眾侍郎國瑞帶兵進攻范縣賊首郭廷珍等窮蹙投誠當將縣城克復辦理甚為得手著僧格林沁乘勝進攻將各股捻逆次第殲除毋留餘孽○僧格林沁奏查擒匪見有廣按銅鐵情事亟應嚴禁偷漏其工匠私為成造及偷賣火藥硝磺均應一律查禁除派員訪緝外並咨行山東撫臣譚廷襄飭令地方文武嚴行禁止至簡精銳之師直掩賊巢固屬攻其不備惟曹州東昌等處土匪尚未蕩平且東境各匪無不勾通南捻設我兵南下賊匪繞越而北互為結連剿辦更難著手見在壽張縣屬賊圩均已攻克並收復范縣城池其餘匪徒有勝保一軍足可剿辦曹屬一帶賊巢雖疊經攻破而曹州府南賊匪過多已調國瑞帶兵來營合力剿辦應俟曹屬蕩平後酌度情形或移紮東昌進

剿或督師南下之處候旨遵行先是竹口未克賊兵單經臣咨會勝保就近撥兵會剿該大臣坐擁重兵觀望不前十一月初三日國瑞督飭翼長舒通額等擊賊獲勝將賊首僞元帥張姓徐姓殺斃並獲投誠守備宋懌詩鈐記一顆查宋懌詩係勝保招撫之人何以鈐記尚在賊手西凌阿前在東昌一帶剿匪亦獲有宋懌詩功牌其中恐有不實不盡至國瑞進攻竹口並迎剿援賊獲勝後旋有勝保營中前來招勇之人勾引各營勇丁口稱月給口糧銀三兩二錢臣營勇糧係月給二兩六錢以致國瑞所部勇丁慮募甚多兵心搖動經國瑞派弁將招勇之李登祥拿獲據供係在勝保軍營充勇經副將黃得魁發給招勇札文復訊出李登祥冒戴五品軍功濫入各營招勇情形當將該犯正法查黃得魁係勝保軍營帶兵之員既發札文招勇勝保何得不知顯係故掣兵勢理合據實請旨查辦

上諭議政王軍機大臣等前因勝保奏侍郎國瑞力攻竹口擒圩未下兵勇受傷甚多各圩皆可就撫不必重煩兵力是以諭令僧格林沁酌度辦理茲據該大臣奏國瑞已攻克壽張縣屬賊圩收復范縣城池見因剿辦曹州府南賊匪謂該侍郎來營合剿俟曹屬蕩平移紮東昌或督師南下所籌悉合機宜著即督飭妥辦勝保近以招撫劉占考全股濮范等處一律肅清即欲移師赴皖辦招撫苗沛霖事已諭令將善後事宜妥為安插再行南下劉占考一股是否真心投誠即係別有詭謀勝保固請南下於辦理苗練一事是否有益勝保去後該大臣能否兼顧直境使捻蹤不至北犯降眾盡可相安該大臣洞悉兵機諒能謀畫萬全著即迅速覆奏以慰廑系其曹屬賊匪仍著該大臣督飭國瑞迅速剿洗或咨會勝保進兵夾擊以期及早蕩平所稱獲宋懌詩僞印功牌及勝保派李登祥招勇經國瑞正法其中總有不實不盡之處不妨咨會勝保辦理以免宵小從中煽惑至勝保之為人負氣任性輕聽人言誠所不免惟念其辦事勇往向屬可用見當需才之時不能不稍假事權仍當諭令力除積習共濟艱難僧格林沁素矢公忠亦必不至稍存意見也前據御史楊榮緒奏參國瑞村莊賄賂令議政王軍機大臣傳詢該御史旋據指出盧朝安厚饋一節茲據該大臣片奏查明並無其事等語所奏自係的確該侍郎既能打仗奮勇即屬良將仍應屬令勉勵圖功儻此後查有聽情受賄等事尚可隨時參辦毋稍徇隱將此由六百里諭令知之○諭前據嚴樹森奏東匪竄入豫境諭令該撫速行剿捕茲據奏該匪竄入滑潯潯陰等屬復由新鄉竄入原陽等處並將東直各匪偏處情形繪圖貼說呈覽等語東匪竄擾豫境窺伺懷慶見經嚴樹森派撥重兵攔頭截剿當可無虞西竄然使偏令東歸不能大加懲創則難保該匪不再圖竄擾副將楊飛熊等既據該撫奏稱係屬勁旅即著督飭實力剿擊悉數殲除以塞賊膽即或被剿東遁該副將等務當越境跟追會合直東等處官軍認真夾擊勿畱餘孽令匪徒不能再窺豫省方為妥善至東省之教匪會匪到處蔓延要以東昌曹州為巢穴見在劉占考等雖經收撫而此股匪徒竄擾如故且大名各屬偏地匪蹤亦安得謂河北已就肅清見惟擣其巢穴盡絕根株自可無虞滋蔓僧格林沁專辦山東軍務譚廷襄身任地方均屬責無旁貸勝保見亦飭令進兵曹屬所有東昌曹州各匪除已就撫外其餘匪眾即著僧格林沁勝保譚廷襄悉心會商迅速調派得力官軍分投進剿務期掃穴擒渠一律淨盡不得稍涉遷延意存粉飾其大名各屬匪

眾並著勝保派兵接剿速行剿除即著文煜嚴飭地方文武一體會剿嚴扼北犯儻有疏虞惟文煜是問將此由六百里各諭令知之○諭賈臻奏巨捻乞撫請旨遵行一摺安徽穎阜間巨捻郭名棟習與苗逆爲仇前因壽州被圍曾爲副將黃鳴鐸招其部眾進攻苗巢見聞勝保將次南下先起賈臻營前乞撫願毫各股捻匪爲數甚鉅勢難悉數殲除自應剿撫並用以期漸次廓清郭名棟去逆效順立志既堅應即准予投誠令其立功贖罪以孤苗逆之勢賈臻既駐穎郡即著將招撫事宜就近先行辦理該練圩倡處苗練羣捻之間勢難顯然自拔擬請暫緩雜髮立功以後即一律雜髮亦著照所請辦理惟該練眾至六萬餘名之多良莠不齊務須善爲駕馭庶免再滋事端並著袁甲三彭玉麟妥籌兼顧毋令再行反覆所稱郭名棟密派隊伍截剿苗逆東援練眾並俟楚軍於正陽壽州開仗時即率所部攻剿下蔡以分苗逆之勢著袁甲三等即飭令郭名棟相機妥辦及時立功自效另片奏沈卓捻首趙錫如被擊窮蹙赴廬鳳道葉春培處投誠經葉春培散其黨與並擇留精壯百餘名應用著即責令該捻首立功自贖並將捻首奎宣嚴捕務獲以淨根株將此由六百里各諭令知之○諭前因浙江軍務緊急疊諭慶端速行出省督剿並調兵由海赴援並諭令毓科調派劉于濤等兵勇入浙救援茲據薛煥奏浙省自紹興失守賊眾數十萬圍攻杭州張玉良中礮殞命見惟記名總兵況文榜一軍向駐鳳山門外並探聞紹興府屬各縣悉行失陷甯波府失守各等語浙省賊勢猖獗復由紹郡攻陷甯波省城愈形危急且該匪於甯波擄掠釣船爲縱橫海上之計恐愈不可收拾慶端著疊次寄諭諒已即行出省馳赴閩浙交界督辦防剿准此時浙省全體糜爛但能保守省城庶各屬尚可徐圖恢復閩省派往官軍須由南路進剿固足以分賊勢而於杭州省城向恐緩不濟急著慶端即於臺灣漳泉等水師內挑選精銳數千名配齊礮船糧餉刻日由海道馳赴浙江探明捷徑迅速救援杭州其溫州黃巖等處水師如有可調派則去杭較近並著慶端一併派撥由海援杭其前調陸路援軍仍著催令分路進攻如事機緊急慶端即親督各軍出省赴援浙省係該督兼轄省分何路可以進兵即由何路援剿一切不爲遙制前諭毓科調撥援浙兵勇未據覆奏見在浙省待援急迫著督催道員劉于濤等星速統兵前赴浙江相機進剿此外如有可撥之兵並著添撥設法繞道前進毋許稍存畛域之見致有貽誤將此由六百里加緊諭令知之○諭前因浙江嚴州等城先後失陷杭州甯波危急疊經諭令曾國藩速籌援浙之師並令左宗棠取道三衢與李元度之軍星馳赴杭力解城圍茲據薛煥奏稱杭城被圍四十餘日賊匪有數十萬之多該逆堅築木城數十里內外不能通氣前由上海雇船從甌子壘入江運送軍糧礮火接濟杭省因十城門均有賊營阻隔不能運入城中兵民無從得食勢難持久等語杭城危急萬狀設有疏虞大局何堪設想曾國藩節制四省責無旁貸前經諭令籌撥楚師援浙尚未覆奏著即懷遵前旨迅速派調並將布置情形速行馳奏以慰廑念左宗棠此時諒已入浙著即會合李元度一軍星馳赴杭力保危城至鮑超一軍見駐甯國距杭州省城較近若由廣德州取道入浙既可徑援杭城兼可分援湖郡或徑由徽郡取道於潛昌化進援杭城並著曾國藩飭令該總兵相機辦理此時浙省偏地逆氛自應先其所急曾國藩務即飭令鮑超星夜援浙

以顧全局至甯波一帶著左宗棠於杭城解圍後分兵接應力圖克復浙東各城毋令久踞東南半壁大局關繫非輕應如何添兵援應迅掃賊氛該大臣等諒能統籌全局不至貽誤事機也將此由六百里加緊各諭令知之○己未諭內閣前因蠲緩各省錢糧恩旨往往爲地方官吏抑閣以致屯膏不得下逮疊經通諭各直省督撫認真辦理以恤民艱其地方完善及並無災歉之處自應輸將踴躍惟正之供茲據周祖培奏北省近畿各處漸多倚恃團眾抗糧拒捕之事其故由於州縣不得其人平日臨財貪墨辦事武健爲民深仇疾視甚至日久賞罰不信告令不遵脅制官長而爲之官長者亦不敢與之相較等語我國家深仁厚澤淪浹民心見在山東河南等省遭賊蹂躪及間遭災歉地方疊經降旨分別蠲恤其完善地方均尙能爭先輸納然如該大學士所奏情形亦復早有所聞總由官吏不肖有激而成誠堪痛恨著各該督撫於所屬州縣務各秉公遴選潔己愛民之員俾膺民社如有貪聲劣迹平時不得民心者立予嚴參重懲經此訓諭之後儻有地方牧官奉職無狀以致民間怨毒釀成聚眾抗糧之案滋生事端必將該管督撫上司各官一律重懲決不寬貸凡爾百姓皆吾赤子具有天良得一親民之牧令必當無待追呼而輸將恐後斷不至藉口官吏輒敢抗違朝廷賦稅自爲亂民以取罪戾也將此通諭知之○申諭各省整頓鹽務○庚申恭上 大行皇帝 尊諡 廟號翌日頒詔天下覃恩有差○諭議政王軍機大臣等譚廷襄奏南捻出巢尙在單縣一帶盤踞邊馬四出攻撲民寨拏獲被裹難民供稱匪等商議北竄等語見在僧格林沁駐軍曹州國瑞之軍亦同抵長溝即可移師進剿是北路及東北均有大兵堵禦惟該逆究從何路竄撲尙難豫料勝保見在館陶將欲移軍赴皖務將北路肅清方可他往諒其所帶馬步各軍未卽啟行著該大臣等卽乘此機會併力曹南以爲一鼓殲除之計譚廷襄見赴東昌著將續探軍情卽行徑報僧格林沁勝保軍營會商辦理庶可聯絡一氣總期先發制人先將此股敗匪殄盡方可乘勢搗其巢穴淨絕根株該大臣等諒能同心協力迅奏膚功也將此由六百里諭令知之○諭部院倉場嚴懲書吏花戶舞弊○詔各省隨時甄別捐輸保舉人員○廣四川崇慶漢萬大竹仁壽安岳池三臺中江遂甯富順等州縣學額各一名○辛酉曾國藩毓科奏近年以來江西屢被賊擾本年三月七月僞侍王李侍賢僞忠王李秀城先後由江入浙皆以廣信爲出入之途是欲保江西宜於廣信設防欲援浙江宜從廣信進兵必然之勢也自紹興失守杭州危急等日夜憂懼以浙境一日不靖則江西一日不安屢次函商救浙之策無如地廣兵單不敷分布而浙中賊勢浩大亦非數千人所能救解 國藩見令鮑超一軍由青陽前進朱品隆一軍由石埭前進會剿甯國欲以分制浙中賊勢第恐僞輔王悉眾堅守勢難遽拔甯郡之城卽不能少解浙江之阨惟幫辦軍務太常寺卿左宗棠久駐廣信距浙較近其平日用兵取勢甚遠審機甚微近日屢與 等書函毅然以援浙爲己任督 慶端撫 王有齡亦奏請左宗棠統軍入浙 等往返熟商卽請左宗棠督率所部進援浙江並將駐防徽州之臬司張運蘭駐防廣信之道員屈蟠駐防玉山之道員王德榜參將顧雲彩駐防廣豐之道員段起各軍及副將孫昌國內河水師均歸左宗棠就近節制調度左宗棠見駐廣信距 國藩安慶行營已隔千餘里入浙以後相去更遠聲息

難通遇有轉奏請旨之件誠恐耽延貽誤嗣後該處一切軍情應由左宗棠自行奏報以期迅速至其所部各營與信防各軍欠餉太多臣等擬將信郡各屬本年錢漕撥歸徵收以清廣玉各軍積欠並將河口景鎮婺源釐金撥歸該京卿以清各營積欠俟各軍整飭就緒即行分途進發內防外剿進止遲速均由左宗棠相機辦理又奏前奉諭旨飭催衢州總兵朱品隆迅赴本任臣查浙江危急情形在杭州甯紹而不專在衢州欲拯浙江之危宜以大隊直赴省垣不宜僅顧衢防等見擬飭左宗棠一軍由廣信進兵以救浙江上游鮑超一軍由甯國進兵以分浙中賊勢至總兵朱品隆一軍兵數不滿三千不能獨當一路臣已令鮑超由池州進青陽朱品隆由祁門進石埭然後會合一路以攻甯國該二軍者分支則互為聲援缺一則不能獨進衢州自解圍以後防務較鬆閩浙督臣慶端奏明即日起衢督剿李定太似可抽身赴衢不必待朱品隆前往接替且朱品隆久帶湘勇征皖數年形勢熟諳閭閻則人地相宜赴衢則難期得力審度情勢自以先赴甯國為安上諭議政王軍機大臣等曾國藩毓科奏探知紹興失守杭州危急商令左宗棠督率所部赴援並將張運蘭等軍均歸調度一切軍情由左宗棠自行奏報並撥所部各營兵餉一摺所籌與前降諭旨甚為符合深協機宜惟浙省自紹興失守後賊匪圍攻杭州眾至數十萬況文榜等因賊眾未能進攻杭城萬分危急浙西惟存杭州湖州兩府設再淪陷則賊勢聯成一片攻剿益難措手著曾國藩催令左宗棠統領所部迅速前進其臬司張運蘭等水陸各軍均照議悉歸左宗棠調遣一切軍情即著左宗棠自行奏報該京卿務須星速進剿設法馳救杭州再圖收復各城左宗棠軍餉仍著毓科源源接濟毋許遲誤至道員劉子溥知府丁峻之兵勇四千四百名應否調派赴浙抑左宗棠兵力已厚無庸再令前往即著曾國藩左宗棠毓科酌量辦理其鮑超一軍見在青陽著照該大臣所擬飭令會合朱品隆分道並進迅攻甯國以掣浙中賊勢如甯郡未能即拔或有間道可以馳援杭州湖州均著飭令該總兵等隨時相機酌辦將此由六百里加緊各諭令知之○諭勝保奏續派官軍截剿彰衛竄匪並擬赴直豫交界督率調度一摺東省捻首焦克昌等由開州竄入豫省直撲衛輝經嚴樹森派兵擊剿楊飛熊等統帶勁旅馳往迎擊勝保派兵赴豫助剿著即會同豫省兵勇將此股賊匪迅速殲除毋令延蔓見在豫省及勝保所派兵勇為數不少足敷剿辦勝保自可毋庸帶兵親赴直隸交界督剿此時南捻出巢擾及曹單較諸河北情形更覺喫重若再令賊蹤竄入東省腹地致各郡土匪蜂起官軍將有應接不暇之勢北路大局關繫非輕著勝保即迅赴曹郡會合僧格林沁一軍將南捻悉力兜剿盡數殄滅永除巨患勝保務當與僧格林沁和衷商辦各濟時艱以副委任俟南捻殲除再行前赴穎皇將此由六百里諭令知之○諭聯捷奏東匪大股竄入豫境親督兵勇轉戰大獲勝仗一摺東匪擾及豫境橋廟等處經聯捷移防河之師力加剿洗該逆不得肆其蹂躪所辦尚屬妥善惟據勝保奏稱濮范巨捻劉占考投戈歸正當即飭令薙髮分別犒賞各等語茲據聯捷奏稱劉占考等糾集東捻由毫范竄入豫境等語查十一月下旬劉占考正在就撫之時何以又糾東捻竄豫是否勝保所辦招撫事宜係屬不實不盡抑係聯捷所奏未能確實之處著聯捷查明據實覆奏又據聯捷奏稱幫辦防河軍務段晴川因母

病回籍省視見未在营等語段晴川係屬奏請幫辦之員責任甚重豈可來去自由段晴川係於何日回籍並是否實因母病離營抑或另有別情並著嚴樹森聯捷奏將此由六百里各諭令知之○以萬啟琛署安徽按察使由前任湖中督道署○王戊欽奉 慈安皇太后 慈禧皇太后懿旨恭親王之長女聰慧軼羣素為 文宗顯皇帝最所鍾愛屢欲撫養宮中晉封公主 聖意肫肫言猶在耳自應仰體 先帝之心用沛 特恩著即晉封為固倫公主以示優眷所有服色體制均著照固倫公主之例傳諭總管內務府大臣知之○諭內閣吏部奏遵議嚴樹森處分等語前因河南已革布政使邊浴禮玩誤廢事嚴樹森未能露章參奏降旨交部議處茲據吏部照例議以降一級調用河南巡撫嚴樹森著加恩改為降三級留任○諭毛鴻賓奏粵逆竄擾會同被剿復竄黔陽芷江見飭各營兜剿並防剿情形一摺粵逆石達開由開道繞越楚境經各路兵圍擊剿復經江忠義等軍擊退其來鳳一股原係石逆餘黨雖屢經擊卻而其間隘口紛歧誠恐與石逆大股糾合無論擾蜀擾楚稍一逞志則其勢日張亟宜湖北湖南兩省併力剿辦方足以遏賊鋒道員劉嶽昭一軍已由鄂省飭帶隨州得勝之師由施南進剿來鳳之賊著官文李續宜迅飭該員會合湖南各軍奮力進剿務將此股賊匪速就殲滅一俟楚境肅清即飭該道率領所部前赴四川交駱秉章調遣湖南方以全力剿辦石逆大股龍山兵勇其單毛鴻賓調赴桃源之總兵鄭陽和等軍著即飭令相機速進會合北省之兵先將來鳳股匪蕩平以免石逆勾結石逆全股尚在沅江著江忠義督軍兜圍迅速殲滅毋令兇頑再得免脫以除巨患而免蔓延將此由六百里各諭令知之○諭馮子材魁王奏逆匪分道犯鎮見籌防剿情形一摺江皖大股逆匪撲犯鎮江雖經馮子材派隊出擊小有斬擒而大股賊勢尚未挫敗鎮江為南北咽喉關繫緊要見在兵力較少防剿兩不能敷該總兵等擬咨行揚州軍營撥兵援剿著都興阿迅速挑派勁旅遴委得力將弁管帶前赴鎮江協剿馮子材等務即激勵將士會同揚營兵勇將城外屯聚賊匪悉數殲除江北防務及沿江水面一帶並著都興阿黃彬督飭水陸官兵一體嚴防毋令賊匪乘間竄渡將此由六百里各諭令知之○湖南巡撫毛鴻賓奏軍興以來東南數省因制兵不盡足恃不得不更議招募湖南首倡義旅各省踵而行之於是疆場之間勇多於兵湖南之勇又常居十之七八各省督撫習聞湖南勇丁之得力紛紛委員前來招募而於所以得力之故未加詳察弊將不可勝言查湖南自前安徽撫臣江忠源辦理團練勒平雷再浩股匪後粵西賊起率以從征始有楚勇之名迨前雲貴督臣張亮基今四川督臣駱秉章先後撫楚虛已求賢知人善任適今兩江督臣曾國藩在籍奉旨幫辦團防日以忠義氣節激勵鄉人又得今太常寺卿左宗棠文武兼資之才從而贊助之官紳一體上下同心人思自奮其時募勇章程首以擇將為主有將領而後有營官有營官而後有百長有百長而後有什長有什長而後有散勇遂加遴選遞相鈐制凡勇夫皆取具的保其姓名籍貫戶鄰團長逐一登注於冊按籍可稽在營則營官得而治之同籍則地方官得而治之是以無事能恪守營規有事能懷遵軍令並非貿然呼聚數百千人遂可驅之以策戰陣之功也至於帶勇之多寡又必因其人之才力為等差用兵日久有積功保至提鎮副將而實不能將千人者任之苟失其宜終必致

於債事至遊手亡命之徒所在皆有殺人放火視爲故常投身入營則恃勢橫行莫敢誰何一人倡首眾人從而效尤一營壞規聚營俱難整飭非獨虞目前之潰決更恐滋異日之隱憂前准江蘇撫臣薛煥來咨委副將滕嗣林回楚募勇萬二千人臣察滕嗣林膽識才力殊非能統萬二千人之選止以江蘇軍務緊要未便禁其開招當即諄飭慎選營官如無得力幫手與其多募以自累不如少募之足恃乃不數日即據該副將稟報募足四千人剋期拔營臣遂加訪查始知滕嗣林在岳州招募不問來歷不看技藝不取保結但有自稱能募五百人者即給予營官札委能募百人者即給予百長札委苟圖充數不顧其他以有限之餉養無用之兵與不戰之勇豈不可惜且此等烏合之眾不能殺賊徒以擾民臣札飭嚴加揀汰如再草率從事即當咨明停止又准河南撫臣嚴樹森河南團練大臣毛昶熙來咨委已革副將周鳳山回楚募勇三千人臣知周鳳山向隨前湖南提臣塔齊布軍營升至副將追塔齊布病故後周鳳山接統其眾一敗於樟樹鎮再敗於吉安三敗於進賢是其因人成事非獨當一面之才已可概見其在吉安時擅招遊勇異常騷擾經駱秉章胡林翼奏參革職此次奉委來南又於途中濫收守備劉江清爲差官劉江清包攬客貨經過岳卡不服盤查兇橫萬狀經臣將劉江清查革交長沙府審辦以示懲儆伏思周鳳山前以招勇騷擾被參革職今勇尚未募而其差官倚勢兇橫滋擾局卡既已如此若使成軍以出其騷擾當復何如嚴樹森等未知周鳳山之底蘊固宜採及虛聲臣洞悉其詳何敢稍存遷就已緘咨嚴樹森毛昶熙屬其不可爲周鳳山所誤此外如浙江江西等省募勇之員接踵而來臣若概行禁止必將議爲畛域之區分而利害攸關要不能不權衡以期有濟大抵兵無強弱視將之強弱爲轉移求將之道當觀其深爲偏裨而膺統領或並其偏裨之所能者而亦失之識有短長才有大小未可一概論也抑臣更有慮者湖南兵勇援剿各省及畱防本省合計數十萬人以一省之才應天下之需勢必有所不給目前湖南農工兩途已覺事多人少招募不已其弊不使田野荒蕪不止古今人才原不擇地而生亟應各就各省搜求幽隱鼓舞振興奇傑之士必有聞風而起者不必湖南之勇始能殺賊不必湖南之人盡能當勇也仰懇飭下直省督撫及各路統兵大員認真選將就地取材務在募一勇即得一勇之力庶平時紀律嚴明不致虛糜糧餉他日事竣遣散亦免爲害地方湖南幸甚天下幸甚

上諭毛鴻賓奏縷陳招勇流弊切中事情不爲無見已寄諭各督撫及各路統兵大臣認真選將就地取材不得專恃楚勇致滋流弊嗣後各省如有前赴湖南募勇之員著毛鴻賓隨時察看酌量妥辦至湖北之勇向稱勇敢善戰各軍營如前赴該省募勇亦諭令照此辦理其所募之勇仍著按照湖南章程挑選並不准以游手無藉之人濫竿充數至所稱已革副將周鳳山各節已諭嚴樹森毛昶熙查辦矣將此由六百里諭令知之○諭毛鴻賓奏縷陳招勇流弊所奏均屬可採用兵之道擇將爲先求將之道當量其識之短長才之大小以爲器使且該督撫及統兵將帥誠能虛心採訪何地無才不必湖南之人始能充勇湖南之勇始能殺賊嗣後各直省督撫及各路統兵大臣務當認真選將就地取材各就各省按照湖南募勇章程妥爲辦理其所派募勇之將領尤須酌量該員才具果能帶勇若干方令其募勇若干庶因材器使不至統率無方至

所募之勇籍貫來歷尤應認真嚴查不得以游手之人濫竿充數尤不得上下相隔竟至將與勇兩不相識一旦有警賊匪得以混入勇中無從覺察以致貽誤事機湖南湖北所募之勇在各軍營率多勇敢善戰各省如有前赴湘鄂募勇之員並著知會該二省督撫隨時察看如有前項弊端即行參辦將此由六百里各諭令知之○議政王等議上京旗各營練兵章程從之○命江甯副都統魁玉幫同甘肅西甯總兵官馮子材辦理鎮江軍務○癸亥諭內閣御史任兆堅奏大臣伏法情罪未明請旨昭雪一摺科場條例至爲慎重如果主司舞弊行私自應明正典刑但亦當職證明確罪當情真方成信讞若如所奏柏棧一案全由載垣等深文周內置柏棧於重典藉以盜竊政柄若日久不予昭雪何以持刑憲之平此案即著禮刑兩部會同將原案悉心確查秉公詳議具奏○僧格林沁西凌阿國瑞奏僧格林沁西凌阿駐紮曹州府東南大屯地方探得南路相距二十餘里尙有大股會匪盤踞正擬督軍進剿十二月初一日國瑞督領翼長舒通額馬隊到營值大股馬步賊匪列仗來撲距營較近西凌阿國瑞即帶領馬隊迎剿行至張家塘地方該逆馬步約六七千人直前撲犯我軍奮勇進擊賊遂敗退官軍追殺三十餘里殲賊四五千名並斃賊目數名初三日探得曹縣馬家集係逆首焦桂涓老巢即日移營進剿甫至馬家集南捻劉添詳等帶領馬步賊萬餘前來援應曹屬捻匪已至袁家園李家集盤踞國瑞遂帶步隊殿位攻剿馬家集賊巢西凌阿先帶馬隊前往袁家園進剿僧格林沁亦帶馬隊策應該逆列隊北來眾約一萬餘人西凌阿指揮馬隊包鈔該逆并死迎拒因我馬隊奮擊賊即潰敗斃甚多該逆有竄入袁家園藏匿者有向西南兩路竄逃者其西竄之賊經翼長舒通額等帶領馬隊追剿南竄之賊經副管恆齡帶隊追剿等督領營總富和蘇克金搜殺袁家園及附近各村隱匿賊匪一千餘名救出難民五百餘名分路追殺二十餘里共斃賊三千餘名據難民供稱大小捻首已被我軍殺斃十餘人並稱黑旗李加磨等股尙有接踵前來之信國瑞復督步隊殿位進攻馬集賊圍圍內賊匪倡脅居民死守我軍開放大礮擊斃多名旋據難民報稱賊匪全向南竄見在圍內俱係良民西凌阿國瑞各帶馬步隊伍追剿賊蹤已遠因魏灣地方尙有賊首董執信聚集大股盤踞各處敗匪均歸該處合夥是以撤隊暫緩追擊以便剿辦魏灣之賊至僧格林沁前奏俟曹屬蕩平酌量移紮東昌查東昌之陽穀壽張范縣經國瑞勦撫兼施見無賊蹤曹屬會匪眾多賊圍林立雖經疊獲勝仗尙未能一律肅清況南捻經此次懲創後股是否續來殊難預定如全軍撤駐東昌恐曹屬會匪潛滋皖捻復行思逞兵力不克兼顧僧格林沁暫難移紮東昌惟軍情隨時變更備屆期或可分兵再行具奏至譚廷襄能否駐紮東昌應請旨令該撫酌量緩急奏明辦理上諭僧格林沁等奏勦辦曹屬匪眾並迎剿皖捻連獲勝仗一摺辦理甚爲得手著該大臣仍督飭國瑞等軍實力技捕以清餘孽○諭議政王軍機大臣等前因有人疊次參奏候補運司金安清種種貪贓藉捐殃民各款當經諭令會同藩查明嚴參茲又有人奏金安清自選授湖北糧道後規避延不赴任遂於皖北軍營倡爲捐餉減成之說赴浙江各處指捐皖省紳富之在浙者以數十萬計解營不過十之二三請飭赴袁甲三軍營清算捐款等語金安清藉捐肥己擾累閭

閩本係貪劣之員薛煥等徇情奏請遂充總辦南北兩臺籌餉委員該員藉作威福以致民怨沸騰當此小民蕩析離居豈容此等貪吏肆其剗削著吳棠揀派安員接辦南北兩臺糧餉並勒令該員迅赴袁甲三軍營將前次捐款覈算清楚儘再有意遷延不肯赴皖卽著吳棠派員押解前往以重軍餉該員經手江北捐款著吳棠查明如有虧短侵那不符等弊卽一面嚴參從重治罪一面將該員本籍及寓所杭州上海寄頓貲財先行嚴密查鈔備抵該署督受朕特達之知諒不敢存官官相護之心稍爲徇隱致爲人受累也金安清赴臨淮軍營袁甲三卽督飭覈實銷算不准稍有瞻徇將此由六百里各諭令知之○翁同書奏_臣疊次催飭苗沛霖傳令一律薙髮並須由_臣親驗虛實適聞楚師將至苗沛霖頗懷疑忌頓萌觀望十月二十二日_臣乘舟行至下蔡苗沛霖來謁_臣詰以因何不傳令薙髮苗練枝梧掩飾_臣責以大義該練理屈辭窮據稱一兩日內卽令淮南壽州正陽一概薙髮等語究竟有無把握未敢深信並聞苗沛霖向人傳說捻匪於明年正月十六日出巢不可不備理合附片密陳上諭僧格林沁奏稱東昌陽穀等處見無賊蹤曹屬會匪尚未一律肅清南捻是否續來殊難豫定儘全軍撤駐東昌恐兵力不能兼顧等語自屬實在情形著該大臣等仍遵前旨會合勝保先將曹南股匪悉力殄除又據翁同書奏稱聞苗沛霖向人傳說捻匪於明年正月十六日出巢等語該匪四出竄擾往往先爲揚言自應豫籌堵剿著僧格林沁勝保文煜譚廷襄嚴樹森毛昶熙妥爲籌備督飭各軍並各要隘文武員弁探蹤迎擊總須以剿爲防爲先發制人之計擄穴擒渠盡殲醜類方爲一勞永逸切不可有此疆彼界之分以追賊出境自了門面致蹈從前積習將此由六百里各諭令知之○袁甲三奏據遊擊張景春守備胡占魁稟稱十一月十八日由開道至定遠之南練總守備吳開會圩復與吳開會赴廬境青龍廠把總褚開泰圩內詢知從前粵逆攻陷廬郡附近居民均被迫脅內有吳殿元吳永璧本係良民不得已而受賊僞職常與良民暗通信息屢欲投官苦於四面賊氛難以自拔當定遠捻首張落刑出竄時粵逆偽玲天福高意城於前一日入城接守吳殿元等察知有機可乘一面帶眾進城伴爲助守一面密致褚開泰約期進攻願爲內應等語_臣素知吳殿元等並非甘心從賊是以親錄手諭派令張景春胡占魁馳往與褚開泰等將吳殿元吳永璧招至該圩當面開導吳殿元等感激涕零願效死力約定日期復潛入定城張景春趕回報信事機至緊未便稍遲而一切操縱機宜必須隨時審度有無變更實難豫定當飭_臣子編修袁保恆由長淮衛回營會同建甯鎮總兵張得勝統帶馬步兵勇三千人李世忠亦派守備李丕倬同胡占魁管帶千餘人冒雪前往並調副都統克蒙額等由北路趕回策應二十三日我軍行抵距定三十里之婁王楊各圩調集附近團練銜枝疾走於三更後直抵城下開放槍礮該逆正在糾眾守禦吳殿元等乘勢恐嚇告以官兵勢盛萬難抵敵高意城亦情願納款我軍見東門火起知係內應舉發當飭南路各圩豫備截殺一面直趨東關奮力攻擊守城之賊紛紛逃竄東門大開我兵乘勢擁入高意城首先出城其所帶賊黨猶有巷戰力拒者均被殺斃餘賊盡向南門竄去又經南路張橋集江家巷各民圩沿途攔殺屍橫遍野連凍斃淹斃約計不止千餘人殘敗之匪奔赴梁園店埠向廬郡而去定遠縣城於二十四日卯刻克復

袁保恆等入城安撫並由臣飭令藩司遴委地方官辦理一切善後查定遠爲九省通衢自粵捻竄踞以來南北聲息不通已歷三年前聞張蔭桓西竄立派馬隊追剿以冀復我堅城乃已爲粵逆所踞若曠日持久該逆根蒂既固則與盧巢爲犄角剿辦更覺費手今幸吳殿元等被脅不甘密爲內應我軍於風雪嚴寒之中糾約團練乘夜趕到四路環逼克復堅城從此可冀會合楚師共圖掃蕩實爲皖北軍務一大轉機上諭定遠爲廬郡門戶此次袁甲三密約內應並令袁保恆等乘夜督帶兵練克復堅城調度有方深堪嘉尚卽著撥兵駐守嚴密布置並探明楚師駐紮處所妥爲聯絡以期進取廬州至逆首高意城隨吳殿元等一併投誠經袁保恆許以獎勵並令暫緩薙髮仍回南路串通各圩於廬郡相機行事該編修所籌自必確有把握卽著妥爲辦理儻能迅克廬州肅清皖北必將出力人員論功行賞破格酬庸另片奏苗沛霖請將淮南各圩先行薙髮有無翻悔尙未可定等語本日翁同龢書片奏亦稱舟過下蔡面晤苗沛霖直言訶斥苗沛霖理屈詞窮有一兩日內卽令淮南各練一律薙髮之說苗沛霖性情陰鷲且危不自安所稱薙髮一節似難憑信見在定遠已復與楚營消息相通既經袁甲三派副將徐鶴馳往楚軍營中密商一切俟彭玉麟復函到後如可兩軍會合卽行迅速夾擊並設法招撫各練圩總期計出萬全其殲巨夥務使皖省一律肅清永除後患將此由六百里諭令知之○免廓爾喀明年貢表方物○添設山西粟城鎮東陽東灘三營南溝村西哄雲頭黃澤松煙五汛遊擊都司各一守備三千總二把總七外委十五兵三千六百名改設潞澤澤州遼州三營副將參將都司各一改平定州鳳臺縣兩汛爲營移設守備二裁潞澤等營原設參將以下四十一缺兵三千名太原鎮兵六百名○甲子以部院八旗等衙門遵旨議覆事件遲延命所司認真稽察並嚴定期限○諭各衙門詳定新纂刪增各例舊案歧出者概毀銷○乙丑諭議政王軍機大臣等據彭玉麟奏潞陳下情不諳地方公事請開缺專意剿賊一摺彭玉麟管帶水師屢著戰功由諸生蒙 文宗顯皇帝疊加超擢經朕簡任安徽巡撫原以安徽全省糜爛之餘吏治兵事非得賢員莫能整頓故量才擢用畀任封疆茲覽所奏潞陳十載戎行於水師稍諳駕馭而刑名錢穀皆非所知深恐於地方公事或有貽誤籲請開缺仍帶水師一意辦賊本日已諭令彭玉麟仍酌帶兵勇赴安徽接印任事一俟斟酌有人可以接替再行降旨准令開缺專辦軍務彭玉麟隨同曾國藩出兵最久知之必深是否該撫實係不習吏事於安徽巡撫能否勝任著曾國藩據實迅速馳奏並著於所屬司道大員內擇其長於吏治熟悉軍情者不必拘定資格秉公保奏一二員候旨簡放將此由六百里諭令知之○諭彭玉麟奏潞陳下情請開缺仍專辦剿賊一摺所陳向帶水師不習吏事封疆任重深恐貽誤請開缺仍督帶水師一意辦賊具見眞實不欺不染近來官場沽名釣譽之習深堪嘉許惟安徽全省糜爛粵捻紛乘苗沛霖陰謀回測意在肆擾皖豫乘隙北犯軍情亦萬分緊急是前授彭玉麟爲皖撫仍以督辦軍務爲重係屬用其所長彭玉麟著仍酌帶兵勇前赴安徽接印任事並仍遵前旨繞赴淮北會商袁甲三李世忠等撥兵接應迅速苗練逆氛一俟斟酌有人准令該撫開缺專辦軍務此時仍當竭力籌辦斷不可存五日京兆之心以慰屢念將此由六百里諭令知之○諭官文李續宜奏豫省捻匪

竄圍東陽縣城撥兵援剿情形一摺搶首王懷義等分爲二股一竄餘旗鎮欲援襄樊一由唐縣至東陽城外四面圍撲官文等已派候選知府毛有銘督率所部並咨副都統舒保撥兵馳赴東陽隨州剿辦著卽飭令統兵將弁會同豫省官兵奮力夾擊毋稍遲延該匪蹤跡飄忽此剿彼竄是其慣技嚴樹森務須另派得力將弁迅督兵勇越境追剿會合楚軍夾擊以期一鼓殲除毋以驅逐出境卽爲了事將此由六百里各諭令知之○李續宜奏欽奉諭旨飭將苗練是否可撫如必須剿辦楚軍能否分撥助剿妥籌覆奏臣愚以爲得民之心必助順而後逆敵可息用兵之道必能剿而後撫局可成當苗沛霖謀叛之初附近各圩黨無深明大義之士忠憤鬱結思與苗逆爲難而隱忍不發亦謂髮捻未平故不敢顯與之抗耳而苗沛霖恃此以爲得計詭謀日密裹脅日多迫羽翼已成遂致陰受粵逆僞職陽假報讎爲名使我壽州名城卒爲所陷前據壽州六安官紳稟報述其淫劫慘殺人人切齒願以殺苗自任詎苗逆入城後仍復詭言求撫推其意無非因城守未定以緩我師也不料翁同書爲其所制從而信之近聞探報該逆有儲積米糧備布黨與倡勒民團並暗襲蒙城潁州之信伏念順逆之理不可不明剿撫之機不可不定臣部前派援壽之師已至霍山並飭道員蔣凝學一軍馳駐六安培城濬濠藉爲牽制該逆頗知顧忌未遽猖獗雖一時兵力甚單不敷剿辦而見據蔣凝學等密稟壽州公正紳民多願齊團自效卽脅從之家幅我軍威亦有戴罪圖功之意際此人心效順激勵而拊循之如果因利乘便得以殲厥渠魁固屬朝廷之福卽使刻難殄滅而人人思奮苗勢必孤除惡亦當不遠非然者壽城既陷我仍墮其術中恐自此蠶食鯨吞異日之患更有甚於髮捻各逆者矣臣原擬駐紮楚皖交界地方惟川匪滋擾來鳳豫捻窺伺東陽隨州孝感等處籌剿籌防應接不暇若遠離省垣必致鞭長莫及容俟鄂省軍務肅清再行馳紮楚皖交界地方督辦軍務上諭苗沛霖自攻破壽城後仍以詭辭求撫因其居心叵測業經屢次諭令彭玉麟帶兵赴任妥籌剿辦並諭令袁甲三將附近苗練各圩設法解散一俟彭玉麟馳抵潁壽卽可督兵會剿該逆果知震懾就我範圍亦無難相機辦理茲據李續宜奏必能剿而後撫局可成等語於見在籌辦情形適相符合該撫見飭道員蔣凝學一軍駐紮六安該逆頗知顧忌其壽州紳民既願齊團自效卽脅從之眾亦思戴罪圖功是人心效順極爲可用卽著李續宜飭令蔣凝學將該紳民等加意拊循其被脅民人亦務曉以大義使其樂爲我用一俟袁甲三等進兵卽可會合攻剿其餘援壽各軍應否催令由霍山前進楚省能否添調兵勇均著李續宜悉心酌辦該撫因軍務喫緊未能遠離鄂省著俟辦理得手仍卽馳赴楚皖交界力籌兼顧將此由六百里諭令知之○諭慶端等奏平陽會匪竄陷福鼎北路喫緊一摺福甯爲省垣北路門戶該匪見竄福鼎之白琳地方距福甯府城不遠且恐溫虎各匪水陸並犯省垣亦岌岌可慮亟應妥籌兼顧以防滋蔓總兵秦如虎等馳赴福甯卽責令將福鼎一城剋期攻拔毋令該匪深入浙省係該督兼轄省分毋得株守省垣藉口防務置浙事於不問所稱令副將吳鴻源督帶兵勇航海馳赴紹興府屬之曹娥江劃江而守保衛甯波是該督尙未知甯波失守之信見在是否可行須令相機辦理且所派兵勇人數過單亦恐不能得力仍著添調勁旅責令進攻以牽賊勢該督務當內顧

省防外援鄰省不得顧此失彼稍有疏虞將此由六百里諭令知之○丙寅命吳棠揀兵分布蔣壩等處以防粵逆並命駐清江擇要立營毋令捻匪竄渡○丁卯曾國藩奏奉命節制浙江全省軍務所有江蘇安徽江西浙江巡撫提鎮以下各官悉歸節制伏念臣自受任兩江以來徽州失守祁門被困竭蹶之狀屢見奏報幸託聖主威福僅得自全至於安慶之克悉賴鄂軍之功胡林翼籌畫於前多隆阿苦戰於後並非臣所能爲力江蘇各郡羣盜如毛乃臣職分應辦之事受命年餘尙無一兵一卒達於蘇境是臣於皖則無功可敘於蘇則負疚良深乃蒙皇上天恩不責臣以無效翻令兼浙江軍務並四省巡撫提鎮以下悉歸節制此非常之寵遇臣自顧菲材實難勝任自九月以來浙省軍情日見危急臣與毓科左宗棠等往復函商援救徒以地段太寬兵力太薄既須援浙又須顧皖保江三省有並重之勢一時之兼全之策直至十月下旬始定議左宗棠由衢州援浙從正路以張軍威鮑超由甯國進兵從旁路以制賊勢大局所繫必應統籌臣本未敢推諉不必有節制浙省之名而後盡心於浙事也前奉諭旨令浙省提鎮以下均歸左宗棠節制臣已咨催左宗棠迅速起行但以遙制浙軍尙隔於千里之外不若以左宗棠專辦浙事可決於呼吸之間左宗棠前在湖南撫臣駱秉章幕中贊助軍謀兼顧數省其才實可獨當一面應請皇上明降諭旨令左宗棠督辦浙江全省軍務所有該省主客各軍均歸節制毋庸兼統浙省額懇天恩收回成命在朝廷不必輕假非常之權在臣亦得以少安愚拙之分其浙省軍事凡思慮所能到才力所能及必與左宗棠竭誠合謀不敢稍存畛域如因推諉而貽誤即求皇上按律治罪臣忝任江督三省巡撫提鎮以下各官例得節制戰之會典著之敕書各文武亦皆恪遵憲章不必更加申誡至袁甲三都興阿各路軍情謹當隨時商辦其江北皖北地方文武已嚴飭仍歸該大臣等節制不得稍涉玩視惟當與各僚屬同心圖治共濟艱難伏懇皇上俯鑒愚忱允所請不勝感激悚懼之至又奏江蘇浙江地方軍務關係甚重欽奉諭旨飭臣酌保堪勝封疆將帥人員臣查蘇浙兩省羣賊縱橫安危利鈍繫於巡撫浙江巡撫王有齡久受客兵挾制難期振作欲擇接任之人自以左宗棠爲最惟此時杭州尚在圍困之際必須王有齡堅守於內左宗棠救援於外應俟事勢稍定乃可更動伏求聖主權衡時勢再降諭旨至江蘇巡撫一缺目下實無手握重兵之人可勝此任查有福建延建道遺缺道員李鴻章安徽合肥人咸豐三年正月在編修任內奉旨派同前工部侍郎呂賢基回皖辦理團防在皖北軍營六年歷著戰功八年冬間調赴營隨周歷江西鄂皖三省十年七月初三日臣於保帶淮揚水師案內奏稱李鴻章勁氣內斂才大心細與沈葆楨二人並堪膺封疆之寄旋因祁門危急仍留營未赴揚州該員見在臣營統帶淮揚水師五千人戰船二百號與總兵黃翼升會同辦理安慶之克無爲運漕之捷該水軍出力爲多若蒙聖恩將李鴻章擢署江蘇巡撫該員見統水軍五千再撥給陸軍六七千便可馳赴下游保衛一方地方一切事宜該員亦能洞悉利弊至巡撫駐紮之地上海僻在東隅不足以資控制愚以爲宜駐紮鎮江北可聯絡淮揚南可規復蘇常近拊金陵之背遠制洋面但派勁兵數千保衛上海甯司道一二員經收關稅不必巡撫常駐滬城如蒙俞允應請密諭飭下

李鴻章料理赴任待該員軍抵鎮江後再求明降諭旨至堪勝將帥者臣意中實乏其選臣處所統諸將屢奏報久邀聖明洞鑒惟綏靖鎮總兵鮑超本年正月破黃汶金大股於洋塘五月破劉增林大股於赤岡嶺均屬非常戰績七八兩月馳驅二千餘里克城破敵肅清江西全省厥功尤偉鮑超與李續宜多隆阿勳名相等該鎮見進兵甯國關繫極重可否仰沐特恩獎勵抑或俟諸異日出自聖裁又奏臣欽奉諭旨飭查浙江撫臣王有齡江蘇巡撫薛煥候補鹽運使金安清被參各款臣查王有齡前任蘇藩其籌餉之才為遠近所推許上年升任浙撫適值金陵師潰蘇常並陷之時敗將逃兵萃於浙省以萬難整頓之卒又素無統轄之權時勢之艱亦為遠近所共諒然使另練親兵裁汰疲卒亦未始不可以主而制客轉弱而為強王有齡不諳軍情但求速效整理尚未就緒即催令進圍嘉興且言嘉郡即日可克臣於去夏頗以為慮曾奏明嘉興師疲恐生他變厥後嘉興果敗王有齡不能嚴參以治罪嚴州賊退又復冒奏以飾功於是將玩兵刀遂不可制至本年金華之失蘭谿之陷兵團仇殺弁勇擄掠均不能究諭旨所詢動受張玉良等挾制係屬實在情形今則賊氛環逼餉項久虧即使杭省幸全數萬敗軍亦斷非王有齡所能管轄自去夏以來浙餉月需三十餘萬大率取之甯波紹興紳民輸將非不盡力乃王有齡奏參團練大臣邵燦立予罷黜其下委紳數人皆革職永不敘用其所參者並非軍旅之大端但爭體制之末節以致甯紹眾紳各懷憤恨外間相傳有杭兵不許守紹紹餉不准入杭之說馴至紹郡淪陷杭省圍困皆由官紳水火之所致諭旨所詢輿論譁然者或由於此近年蘇浙官場陋習以黃緣鑽刺為能以巧僧誦詐為才王有齡起自佐雜微員歷居兩省權勢之地往年曾帶浙員赴蘇去年又帶蘇員赴浙袒庇私黨多據要津其委員派捐但勒限以成數不復問所從來委員藉公肥私腹削斂怨勢所不免諭旨所詢屬吏多貪鄙之徒但以培克黃緣為事證以臣之所聞殆非無因江蘇巡撫薛煥前在蘇州府任內頗著循聲在上海道任內辦理關稅及外國事宜亦臻妥協及擢任巡撫駐紮上海陸續募勇四萬餘人每月糜餉二十餘萬不能專辦一路之賊江蘇所存地方惟鎮江揚州兩處尚據形勢該撫未嘗親至兩郡一行又不能多濟餉項以聯聲援上年夏間薛煥奏請通飭各路禁用廣勇而該撫之信任曾秉忠馮日坤等所部多係廣勇曾秉忠之勇搶劫洋船釀成巨案馮日坤之勇在金山團殺紳首團勇多名目無法紀薛煥莫可如何滬城紳民既畏賊蹤之環逼又虞兵勇之肆掠日夕驚惶不獲安處諭旨所詢帶勇非其所長株守上海莫展一籌三十里外即有賊壘等語臣之所聞大約相符自蘇常失陷各縣鎮市流離轉徙萃於上海一隅人民財貨中外商賈文武員弁肩摩轂擊地少官多人浮於事每有差委多由營求而得或並無可派之差亦謀為位置之法輒復添一捐目給一委札其官職較大者如奏派金安清總辦餉局奏免前藩司蔡映斗首府吳雲失守罪名且委吳雲總辦捐局此數人素工應酬不愜人望其所援引之人類多黃緣之輩諭旨所詢官吏奔競如常殆即此類也上海既繁盛異常蘇州之書籍字畫自賊中販賣而出亦充積市肆之中薛煥設立書畫局多延畫工購買名蹟諭旨所詢日享安富娛情古玩者亦與臣所聞相同此外別無所聞丁憂候補鹽運使金安清聰明過人好覽古籍惟矜銜習術專工揣